

黔南叢書

第三集第七冊

碧山堂詩鈔卷六

黔南叢書第三集

玉屏田 榕端雲甫著

門人洪其哲明也編次

飲酒二首

離騷二十五漁父忌偏醒何似傾三雅猶教迂五經人
皆賢阮籍吾亦愛劉伶莫笑鴟夷腹危機看井餅

吾儕師作達幾輩飲人名酒許連車載人須荷鍾行樂
丞焦革釀曹事景山鎗倘築糟邱老應忘世上情

止酒二首

長年名酒德今日飲須停詩隱鈎無力愁繁箒不靈孤
懷常皎皎與衆亦惺惺未是高陽侶何妨取獨醒

五斗依然醉參軍未解醒不如陶處士止酒至今名籬
菊經餐露秫田亦種秔吾生望終古聊謝聖人清

冬中漫興二首

鄉里宜驅下澤車行藏消息比何如未能乘障矜橫草
聊欲閉門學著書濁酒醅醕三爵後素琴汜濫五絃餘
人生如此良亦足何必金門獻子虛

釀雪雲低故故垂朔風吹面粟生肌凍禽塌翅將棲後

怒隼盤空欲下時
糟糠新醅浮臘酒
地爐活火熱蹲鴟
半酣正動微吟興
牆角梅花破幾枝

自題灌畦小照二首

一編常伴橐駝居
抱瓮殷勤廢讀書
莫笑春風欺不在

就床吹落意何如

用盧綸老圃詩語

鰕生自負琅玕腹
藿食聊充沆瀣腸
一事關情忘不得
借書欲問束脩羊

十月八日潘南垞太史見過留酌草堂卽送其抵

家後爲滇南之遊五首

憶君昔通金閨籍伊予正暴龍門額異代猶傳車笠盟
同時那有雲泥隔意氣相期兩少年蛩蟭駉驢亦可憐
別來鴻雁遙天末却望長安在日邊

吾聞東方生有言不用爲鼠用則虎人生虎鼠本何常
龍蛇失志須千古九列紛然爭致身君獨驅車西入秦
函關渭水遍遊歷多少新詩似古人

螺贏戶掩瓜牛廬君來過我心顏舒頗見有客如此否
安知主人爲誰歟麤糲盤餐雞黍約酒闌俯仰悲今昨
莫將故態笑狂奴遙傷大雅何時作

去年霜滑朝天早今朝雪霽乘舟好尺五一別城南天
五尺却返家門道遙憶新晴奉板輿閒居賦罷意何如
久知故事惟香茗不及高堂問起居

我聞西南天萬里鐵橋雲棧凌空起持節使去碧雞山
習流軍盡昆明水松姚烽靖罷銜枚憑弔休生萬古哀
六詔興亡空往事五華臨眺有高臺

偶成

人間萬事故摸稜巧手丹青誤點蠅紕漏早教嘲育長
遺忘莫謾誚徐陵疎狂與世原無迕懶慢於人亦共懲

好醜分明笑何事不妨甘作啞羊僧

雪中雜興五首

天意未吾慳蕭然雪掩關叢殘詩草在炙硯得頻刪

飢雀凍不飛駛雪止復作安得唐希雅寫此雪中雀

天公方玉戲錯怪小兒顛搏弄狡狴寧平分造化權

索笑歲方宴巡簷日幾回策勳讓滕六一夜遣花開

已慮朝烟斷俄驚歲律窮一盃聊自調三白兆年豐

臘月望後夢至一院堦城幽邃窻檻窈窕架度全

唐詩隨手攜一帙以歸爲賈長江覺後一笑

推敲不見騎驢勢
酒脯徒傳設祭時
欹枕夢回成一笑
苦吟學汝忍朝飢

雪後看梅

林雪猶照夜園梅
半吐時月明初過影
竹外見橫枝
暗有真香度
寒惟瘦骨知
羅浮驚夢覺
翠羽亦迷離

歲晏卽事

崢嶸臨歲晏
老屋枕寒岡
臘酒春先破
梅花雪亦香
交遊今日少
富貴幾人忙
好爇松明火
團圞話夜長

甲辰除夕二首

歲盡原知赴壑蛇
誰催時序換年華
兒童多似蕭思話
腰鼓蓼蓼不倦撾

少小嬉遊未可追
中年哀樂幾人知
已憐絲竹爲歡淺
不分屠蘇到手遲

乙巳元日

宜麥已聽三白諺
頌椒復簇五辛盤
呼兒劈紙題新句
臙酒剛消一盞乾

過友人看梅時小桃一株亦開

香雪窻前自作堆
東風幾日復相催
豐腴一樹夭桃色

錯認當筵定子來

春日雜詩用東坡新年韻五首

可否間夷惠吾師李仲元杖藜沽酒地進艇捕魚村志
得身何累蜂喧蝶亦翻草堂春釀滑傾倒幾朝昏

布衾穩所臥風帽側何之柳老鵝黃縷梅殘鶴膝枝已
驚冰泮日復訝雪來時羨殺掠空疾高搏決勝兒

草苗燒痕沒柳搖沙水清東風吹酒市花事滿江城欲
學天隨子相隨北郭生擊鮮非我志誰共討蓴羹

命儔畧少長步履信西東欲得偏提挈眞愁白墮空青

袍長似草雙鬟易成翁長羨幽求子幽求志幾同
寒盡嚴威解春濃麗景繁花鬚爭長樹菜甲欲生園爛
醉誰家酒先過何寺門驚雷破幽蟄饒口飼龍孫

李花

縞裙練悅謝鉛華穠李爭春幾樹花堪笑退之狂小子
乘雲錯認玉皇家

卽景

酒熟經冬琥珀濃園林一夜鼓芳風小桃破萼杏苞折
十日春光爛熳中

玉蘭

比玉凝寒艷微蘭吐異芽唐昌誰得見只有玉蘭花

梨花

昨夜東風何造次梨花競逐曉光開初疑香霧梅千樹
又訝蓬鬆雪一堆淡月溶溶相掩映輕烟冉冉自徘徊
最憐雨洗晨粧靚寒食清明欲近來

偕諸友納涼紫氣山追念純上人贈木菴碧巖

累世逐聲塵息踪凡幾輩端居絕往還獨喜林壑對茲
山雖不高頗擅西南概寺藏窮窅間徑轉陂陀內憶與

影堂別遊興杳然廢松子不知落鶴雛亦已大榻來結
夏人復此林下會彈指去來今洗心清淨退茶話未云
已晏坐日向晦高槐蟬鳴初密篠風生外炎威了不知
幽意庶有在

夏晚卽事

炎天冰雪每嫌遲迤邐涼生碧樹枝徙倚山亭一尊酒
呼僮寫作聽蟬詩

七月一日立秋小飲作二首

七月剛逢一日秋九秋屈指恰從頭已殘畏景金猶伏

乍撼商飈火欲流
亂草怨蟲驚絡緯
平原獵騎感驅劉
新涼不淺微吟興
一酌逡巡散獨愁

秋氣紛然驗梧葉
乍飄金井落銀床
天教駛雨消殘暑
座受微風逗小涼
姪姘菱荷憐晚摘
輪囷瓜瓠喜新嘗
人間無限悲秋客
獨向人間作酒狂

用坡公粲字韵自壽一章呈座客

人於天地間每笑鑿齒半而視乎全人
食粟還可歎漆園有傲吏齊物本非玩
絙人視富貴一笑黃土散紛吾書堆中
誰歟蠹魚伴日夕棲桀括曉漏催曷旦
何處蓬

萊山幾時玉皇案長年飽菰菽曾何知理亂嬾慢況不堪蓬垢忘櫛盥未甘秧馬勞應共土牛緩所恨蓬之心講道何時貫無聞迫見惡齒力寢衰懦嗟哉百年人暗盡灰中炭那得痴龍珠一問九仙館黃雞謾共唱濁酒先自煖不憂白日沒早愛明星粲

宿中興寺

宿雨朝已歇遊興狂乃逞齷齪屢穿壑蹠蹠還陟嶺徑冒薦蘿僻山散煙霞迴瀑聲殷轟輻峩峩入徐靚頓令出世心忽在無人境帛公吾夙好徑造不待請誰言方

丈室廣廈欲相併麈尾捉松枝餘物皆可屏茶瓜忘日
夕清言味頗永須臾梵放聲初地一寂靜月色上方來
露坐不知冷牆隅一角花對客嬌弄影誰能齊捨却而
悟無生忍

蔣厚符招集甲秀樓

楊花飛雪滿春城好事真能載酒行山自靈多開甲秀
水於清絕見南明也知令僕他年事且趁登臨我輩情
勝跡常留成勝賞中丞不見有題名

西有黔靈山
南明河名

贈寇鐵峯兼懷蘇齋刺史

人生會合如搏沙憶同作客山縣衙幽尋肺腑重掩地
爛醉富貴鋪堂花搏沙放手還復散主人趣赴追鋒車
君也歸臥黔雲岫吾亦稅駕湘江涯參商始意有出沒
針芥誰信無殊差竭來箠竹遠作客君忽過我不我遐
南陽朱季况磊落相逢一笑忘咨嗟天桃吐萼杏苞拆
山城爛熳蒸紅霞潦倒但竭尊中蟻畢逋那問城頭鴉
我戀歸期返南楚風衫雨帽披欹斜君尋舊遊客播地
鄭莊置驛驂驪駒鴻泥軒故依然在爲問溪山無恙耶
臨風遙憶鴻泥主邊庭萬里悲蘆笳

時寇復赴餘慶
幕主人鄭氏